

INIESTA E CIALINE: STORIIS DI AMICIZIE DI CJASE NESTRE



Andrés Iniesta, metronom dal Barça e de nazional spagnole e par un lunc timp miôr regiist dal mont, al à un tifôs speciâl in Cjargne: so "cusin" Ezio De Prato di Cjaline di Davâr.

Cualchi an indaûr lu ai cjetât par fâmi contâ la sô storie.

Al principi dai agns Sessante, Ezio al è lât a cirî fortune in France tant che tancj furlans. «O soi partît a 17 agns e o ai scomençât tant che manoâl, duncje muredôr e dopo diretôr di cantîr. Intal '77 o soi jentrât intune imprese impuartante di costruzions cun cantîrs in dut il mont e o ai lavorât par lôr par trente agns. O ai cognossût la mê prime femine propit a Paris. O vevi 20 agns, e o levi a balâ cun amis spagnûi: a son stâts lôr a presentâme, intal metrò. Si sin maridâts zovins, e o vin vût cuatri fis». La parintât e je di bot spiegade: «La mê femine e je la cusine dal pari di Andrés. A son originaris di Fuentealbilla, un paisut a 130 km di Valencia». Di Andrés Iniesta inte lôr famee a son tancj: «Ducj si clamin cemût

che il nono, che al jere apont fradi dal pari de mê ex femine». «O vevin une cjase a Fuentealbilla dulà che o levin in feris. E o ai vût la ocasion di cognossi dute la famee e di preseâ lis cualitâts: int umile e lavoradore. Il pari José Antonio al jere muredôr». Andrés al nassè ai 11 di Mai dal 1984. «O cognòs il frut fin di piçul. Par lui al esistev dome che il balon: in pais e je la scuele cui cjamputs e lui al jere simpri li». Andrés al à scomençât cu lis scuadris di zovins de Albacete. «Un dì, dilunc di un torneu, i dirigents dal Barça lu à notât e a àn fat ae famee una propueste par puartâlu a Barcellona». Al principi il frut al jere bessòl e al steve ae Masia, il convit des zovinis dal Barça che si cjate devant dal "Camp Nou", ma dopo un pâr di agns dute la famee e je rivade a Barcelona e Andrés, che al passave la zornade tra scuele e alenaments, al à podût biadelore tornâ a durmî a cjase. Un fat speciâl: pal Centenari dal FC Barcelona dal 1999, Iniesta, che al veve 15 agns, al è stât sielt par rappresentâ il circol insiem cun Guardiola intune visite dal



Pape, forsît parcè che il piçul al jere il miôr cadet dal vivâr. Alore Pep i à dît: "O soi sigûr che tu cjararàs il gno puest intal centricjamp dal Barça". Fin a pôcs agns indaûr, la uniche foto che Andrés e tignive picjade inte sô cjamare e jere propit chê cun Guardiola, nissune altre». Ezio, che al à seguît dute la carriere di Andrés, si vise ben cuant che, intal 2005/06 l'Udin per prime volte al rivâ ae Champions e inte fase a zirons e fo gjavade a sorte propit cuntri i catalans. «Chel an o ai viodût dutis lis partidis in cjase. Al "Camp Nou" l'Udin al à pierdût 4-1 ma al à zuiât ben. Par me e je stade una braûre: o levi cun amis spagnûi al stadi e ducj si domandavin cui che o fos, viodût che o batevi lis mans par dutis dôs lis scuadris». Ae tornade e je stade la apoteosi. «Si sin sintûts par telefon, Andrés mi à domandât se o sarès lât a viodîlu zuiâ al "Friuli". "Dal sigûr, preparimi i biliets" i ai dît. Tal albiere Astoria però o ai vût cualchi probleme parcè che no lassavin jessi i zuiadôrs. Ae fin o rivarin a cjetâsi tor lis 18.00, prime di lâ al stadi, pai tancj suspirâts biliets. Cuant che o soi vignût fûr dal albiere cu la maie dal Barça ma fevelant par cjargnel une gjornaliste dal TG regional mi à metût il microfôn denant domandantmi: "Cemût mai un furlan cu la maie dal Barcellona?" Cussi o ai contât in curt la mê storie». Al bastave un pont par cualificâns ai otâs di cope dai champions. Il Barça, za qualificât tant che prin dal grup, al vigni a Udin par fâ une partide di alenament ma l'Udin invezit al someave che al fos lât jù in cjamp par pontâ suntun assurto 0-0: risultât finâl 0-2 pai catalans, cun rêts di Ezquerro e propit di Iniesta. «De nestre machine, daûr de corriere dal Barça direte al aeroport di

Roncjis o ai clamât Andrés par ringraziâlu in maniere ironiche pe partide e pal gol. Lui mi à rispuidût: "Primo (cusin, par spagnûl), ce volevistu che o fasès, o jeri di bessòl devant de puarte vueide, mighe o podevi tirâ fûr...". No volevin segnâ, no i interessave vinci la partide, in cualchi mût a volevin judâ l'Udin». «O ai viodût la semifinâl cuntri il Milan al "Camp Nou" e, a sorprese, ancje la finâl di Paris. O jeri partît de France in machine di bessòl e o pensavi di viodile in tv. Ma, rivât in Cjargne, o ai fevelât al telefon cu la mê ex femine: mi à spiegât che il cusin al veve clamât par invidanus e che jè e veve declinât. "Torne a clamâlu daurman e acete l'invit!", e mi soi metût in machine par tornâ indaûr». Il pari di Andrés al à la fobie dal avion, al va dome aes partidis in cjase o a chês dongie di Barcelona. «Pe finâl a vevin organizât dôs corieris: intune dute la famee, nono comprendût. Ju spietavi tal prin autogrill dopo Arles cu la bandiere dal Barça in biele mostre: a passavin i catalans e a sunavin lis pivetis. O vin passât dôs zornadis bielonis a Paris, l'ambient sot de Tour Eiffel al jere fantastic». Il Barça al à vîncût 2-1 cuntri dal Arsenal di Thierry Henry, cun rêts di Campbell, Eto'o e Belletti. Iniesta al à zuiât il second timp de partide, jentrant in sostituzione dal infortunât Edmilson: e capitano Puyol al à podût cussi alçâ la seconde Cope dai Champions de storie dal Barça.

Alessandro Gori

Par informazions:
www.arlef.it
arlef@regione.fvg.it
tel. 0432/555812

Par cure de:

ARLEF
AGENZIE
REGIONAL
PE LENCHE
FURLANE

